



Tgi che leva gia daditg far ina spassegiada la notg po far quai damaun la saira. MAD

Baus da la notg van a viandar

Damaun la saira vegn purschì 90 turas da viandar la notg

■ **(anr/vi) Damaun la saira ha lieu l'emprima notg da viandar en Svizra. Il Grischun porscha sis turas per «baus da la notg» che vulan admirar la glina plaina.** Tgi che leva gia daditg ina giada far ina lunga spassegiada la notg e n'ha fin uss betg gè il curaschi, po prender part damaun ad ina tura da notg guidada. La Cuminanza svizra per sendas e trutgs (CSST) organisescha quest onn per l'emprima giada ina notg da viandar.

Las prognosas da l'aura èn idealas per la notg dals 10 sin ils 11 da zercladur. Perquai di *Peter Gschwend*, il pledader da la CSST: «Uss na tem'jau gnanca pli la concorrenza dal campiunadi mundial da ballape.»

Betg adina bunmartgà

Intginas turas da notg sajan gia vendidas ora, uschia p. ex. quella sin las sendas dals cuntrabandists da Werdenberg u ina tura tar ina chascharia en l'Emmental. Radund 90 turas vegnan purschidas en l'entira Svizra. I sa tracta da turas curtas ch'ins po far cun uffants u da turas pli pretensiusas.

Intginas turas na custan nagut. Autras èn cumbinadas cun tschainas extravagantas. Per talas turas èsi sa chapescha da pajar bellas summas. L'anr ha vuli savair da la CSST pertge ch'ins porschia talas turas ch'èn colliadas cun auts custs. «Tgi che va a viandar n'è betg exnum in turist 'bunmartgà', di Gschwend. Plinavant sajan ils organisateurs locals responsabels per las singulas purschidas.

Da qua d'envi mintg onn

Per l'emprima notg da viandar na haja la CSST aposta fatg naginas prescripziuns pertutgant ils custs da las turas. Gschwend è persuadi ch'il martgà reguleschia sez la chaussa: Sch'ina purschida saja memia chara, na dettia quai nagins participants, ed ins na vegnia la

proxima giada betg pli a far amogna la tura.

Da qua d'envi vul la CSST organisar mintg'onn ina notg da viandar. Il termin per l'onn proxim pon ins reservar gia uss. Igl è puspè ina notg da glina plaina, dals 30 da zercladur sin l'emprim da fanadur.

Turas da notg en il Grischun

Damaun la saira han lieu sis turas guidadas en il Grischun. Qua las pussaivladads:

Stussavgia: La tura en Stussavgia cumenza a Thalkirch (1700 m.s.m.) e maina sin il Bodenälpli (1800 m s. m.). Las attracziuns èn: il ramurar da la Rabiusa ed il schul da las muntanelas. La tura è gratuita.

Val Müstair: La tura en Val Müstair cuzzà sis uras. L'emprim vai cun il bus a La Multa (1867 m s. m.) e lura a pe sin il Piz Chavalatsch (2763 m s. m.). A la fin da la tura vegn servi a Sta. Maria in solver da purs. La tura custa 30 francs.

Tumleastga: Dad Almens vai sin la nova «Veia da pumera» sur Riedberg e Canova fin a Pasqual. A la fin datti ina pintga marena da mesanotg en in chastè. La tura custa 30 francs.

Tavau: Da Tavau Frauenkirch vai via Spina vers Monstein. Durant la tura

pon ins visitar la pli «auta» bieraria da l'Europa nua ch'ins vegn indroducè en l'art da far gervosa. La tura custa 35 francs.

Ardez: Ad Ardez existan duas purschidas. L'emprima è ina notg da paraulas cun *Helmut Wittmann* che vegn accumpagnà musicalmain da *Franz Bernegger*. La tura custa 20 francs (senza tschaina).

La segunda purschida è ina tura da duas uras cun in dinner da chandailas. Era durant questa tura vegnan raquintadas paraulas. La tura custa 90 francs cun pernottaziun.

Planeiras: Davent dal parcadi Val Sporz vai cun la sutgera vers il Scalotras. Là datti ina tschaina da pliras tratgas. Suentar tschaina ascendan ils participants a val. La tura custa 66 francs.

Infurmaziuns pli detagliadas chattan ins sut www.wandernacht.ch.